

四庫全書

集部

欽定四庫全書

唐詩紀事卷五十四

宋 計敏夫 撰

韋表微

羅弘信

高崇文

王智興

劉綺莊

馬戴

孟遲

南卓

鄭顥

李羣玉

溫庭筠

周繇

韋表微

表微字子明韋臯鎮西川王緯司空曙獨孤良弼裴說
居幕府厚相推挹以表微比衛玠自以不能及也遷中

書舍人敬嘗語左右欲相二韋會崩

處厚以父事表微

池州

夫子廟麟臺碑銘曰二儀既開三象乃乖聖道埋鬱
人心不開上無文武下有定哀吁嗟麟兮孰為來哉周
雖不綱孔實嗣聖詩書既刪禮樂大定勸善懲惡姦邪
乃正吁嗟麟兮克昭符命聖與時合化行位尊苟或非
戾身窮道存於昭魯邑栖遑孔門吁嗟麟兮孰知其仁
運極數殘德至時否楚國寢廣秦封益侈墻仞迫阨崎
峴關里吁嗟麟兮靡有攸止世治則麟世亂則麇出非

其時麋鹿同羣孔不自聖麟不自祥吁嗟麟兮天何所
七

羅弘信

柳詩云粧點青春更有誰青春常許占先知亞夫營畔
風輕處元亮門前日暖遲花密宛如飄六出葉繁何惜
借雙眉交情別緒論多少好向仁人贈一枝

詠白菊云雖被風霜競欲催皎然顏色不低摧已疑素
手能粧出又似金錢未染來香散自宜飄淥酒葉交仍

得蔭蒼苔尋思閉戶中宵見應認寒窓雪一堆

弘信字德孚魏州人為魏博節度使

高崇文

崇文本薊門將校討劉闢有功為西川節度使渤海鄙
言呼人為髀兒一旦雪下崇文謂賓客曰某雖武夫亦
有一詩乃吟曰崇文崇武不崇文提戈出塞號將軍那
箇髀兒射鴈落白毛空裏雪紛紛或謂北齊教曹之比

也
出比夢
瑣言

王智興

智興為徐州節度一日從事於使院會飲賦詩智興召
護軍俱至從事屏去翰墨智興曰適聞作詩何獨見某
而罷復以牋陳席上小吏亦置牋於智興前於是引毫
立成曰三十年前老健兒剛被郎官遣作詩江南花柳
從君詠塞北煙塵獨我知四座驚嘆監軍謂張祐曰觀
茲盛事豈得無言祐乃獻詩曰十年受命鎮方隅孝節
忠規兩有餘誰信將壇嘉政外李陵章句右軍書左右

曰書生謫辭耳智興叱曰有人道我惡汝輩又肯否張
生海內名士篇什豈易得天下人間且以為王智興樂
善矣

劉綺莊

揚州送人詩云桂檝木蘭舟楓江竹箭流故人從此去
望遠不勝愁落日低帆影歸風引棹謳思君折楊柳淚
盡武昌樓置酒云酒熟人須飲春還鬢已秋願逢千日
醉得道百年愁卒周姬旦棲棲魯孔丘平生能幾日

不及且遨遊尤善樂府嘗守藩服與白敏中崔元式韋
琮相知宣宗時人也

馬戴

易水懷古詩云荆卿西去不復返易水東流無盡期落
日蕭條薊城北黃沙白草狂風吹

送客南遊云擬卜何山隱高秋指岳陽葦乾雲夢色橘
熟洞庭香踈雨殘虹影回雲背鳥行靈均如可問一為
哭清湘

河梁別云河梁送別者行哭半非親此地足征戰胡天
多殺人金罍照離席寶瑟凝青春

中秋夜對月云陰魄出海一望之增苦吟冷搜驪頷重
寒徹蚌胎深皓氣籠諸夏清光射萬岑悠然天地內皎
潔一般心

校獵曲云楚子畋郊野布罟籠天涯浮雲張作羅萬草
結成罝意在絕飛鳥臂弓腰鑊鋸遠將射句踐次欲誅
夫差

許崇久困名場咸通末戴佐大同軍幕崇徃謁之一見
如舊相識留連數月但詩酒而已未嘗問所欲一旦大
會賓友命使者以崇家書授之崇驚愕莫知其來啓緘
即知戴潛遣一介卹其家矣戴與姚合善合贈詩云天
府鹿鳴客幽山秋未歸我知方甚善衆說以為非隔石
聞泉細和風見鶴飛新詩此處得清峭比應稀合又有
送戴下第客遊詩云昨夜送君處亦是九衢中此日慙
慙別前時寂寞同烏啼寒食雨花落暮春風向晚離人

別筵收搏未空戴酬姚合歸字韻詩云岐路非人見尚
得起心中日憶瀟湘渚春生蘭桂叢鳥啼花半落客散
爵方空所贈誠難答冷然一雅風

蠻家云領得賣珠錢還歸銅柱邊者兒調小象打鼓放
新船醉後眠神樹耕時語瘴煙又逢衰蹇老相問莫知
年

夕次淮口云天涯秋光盡木末羣鳥還夜久遊子息月
明岐路閑風生淮水上帆落楚雲間此意竟誰是行行

非故關

夕發邠中路却寄舒從事云飲酣走馬別別後鑱邊城
日落月未上烏棲人獨行方馳故國戀復愴長年情久
夜不能息何當閑此生

楚江懷古云露氣寒光集微陽下楚邱猿啼洞庭樹人
在木蘭舟廣澤生明月蒼山夾亂流雲中君不見竟夕
自悲秋

金華子云戴大中初掌書記於太原李司空幕以正言

被斥貶龍陽尉行道興詠以自傷其方城懷古云申胥
任向秦庭哭靳尚終貽楚國羞新春聞赦云道在猜讒
息仁深疾苦除堯聰能下聽湯網本來踈

露氣寒光盡微陽下楚邱猿啼洞庭樹人在木蘭舟

楚江

懷古夜久遊子息月明岐路閑句却意軒羲日無人尚

戰功句右張為取作主客圖

孟遲

懷鄭洎云風蘭舞幽香雨葉墮寒滴美人來不來前山

看向夕

發蕙風館遇陰不見九華山有作云我來淮陰城千江
萬山無不經山青水碧千萬丈竒峰急派何縱橫又聞
九華山山頂連青冥太白有逸韻使我西南行一步一
攀策前行正鷄鳴陰雲冉冉忽飛起千里萬里危崢
嶸譬如天之有日蝕使我昏沉猶不明人家敲鏡救不
得光影却屬貪狼星恨亦不能通言亦不足聽長鞭揮
馬出門去是以九華為不平

遲字遲之登會昌五年進士第

廣陵城云紅映樓臺綠遶城邊春草傍墻生隋家不
向此中盡汴水應無東去聲

又有過垓下之句云天地有時饒一擲江山無主任平
分過驪山云冷月微煙渭水愁華清宮樹不勝秋霓裳
一曲千門鎖白盡梨園弟子頭已上數篇張為取作主

客圖

遲與杜牧之友善牧之嘗有池州送遲詩其間云烟濕

樹姿嬌雨餘山態活仲秋往歷陽同上牛磯歌大江吞
天去一練橫紳抹歷陽裴太守襟韻苦超越鞞鼓畫騏
驎看君擊狂節離袖颭應勞恨粉啼還咽明年忝諫官
綠樹秦川闊子提健筆來勢若夸父渴九衢林馬擗千
門識車轍秦臺破心膽黯陣驚毛髮子固屈一鳴余固
直三刖又曰丹鵲東飛來喃喃送君扎呼兒旋去聲供衫
走馬空踏襪手把一枝物桂花香帶雪喜極至無言笑
餘翻不悅

又送遲詩云手撚金僕姑腰懸玉轆轤爬頭峰北正好
去係取可汗鉗作奴六宮雖念相如賦其那防邊重武
夫

金華子云遲陳商門生為浙西掌書記以讒罷至淮南
崔相國奏掌書記後以詩寄浙右幕中曰由來惡舌駟
難追自古無媒謗所歸句踐豈能容范蠡李斯何暇救
韓非巨拳豈為雞揮肋強弩那因鼠發機慚愧故人同
鮑叔此心江柳尚依依

南卓

子厚在柳州呂溫嘲之曰柳州柳刺史種柳柳江邊柳
管依然在千株柳拂天後卓為黔南經畧使故人嘲曰
黔南南太守南郡在雲南閑向南亭醉南風變俗談初
為拾遺與崔黯因諫出宰黯為支江卓為松滋

卓贈副戎等詩曰翺翔曾在玉京天墮落江南路幾千
從事不須輕縣宰滿身猶帶御爐烟

卓字昭嗣大中時為黔南觀察使

鄭顥

顥宰相綱之孫登甲科以起居郎尚主有器識宣宗時
恩寵無比嘗夢中得句云石門霧露白玉殿莓苔青續
成長韻此一聯杜甫集中詩也大中十年顥放榜後謁
假覲省於洛生徒餞長樂驛俄有紀於屋壁云三十驛
騶一烘塵來時不鎖杏園春揚花滿地如飛雪應有偷
遊曲水人舊史云顥綱之子尚宣宗女萬壽公主因壽
昌節上壽回夢一宮殿與數十人納涼聯句既悟省石

門之句十字恠其不祥不數日宣宗弓劍上僊方悟其
事乃續為十韻云間歲流虹節歸軒出禁扃奔波逃畏
景蕭洒夢殊庭景象非曾到崇巖昔未經日斜烏斂翼
風動鶴梳翎異苑人爭集涼臺筆不停石門霧露白玉
殿莓苔青若匪灾先兆何緣思入冥御爐虛仗馬華蓋
負云亭白日成千古金滕閱九齡小臣哀絕筆湖上泣
青萍

御爐或
作丹墀

未幾顛亦卒

李羣玉

羣玉好吹笙善急就章喜食鶩及授校書郎東歸盧肇
送詩云妙吹應諧鳳工書定得鵝杜丞相棕筵中贈美
人云裙拖六幅瀟湘水鬢聳巫山十朶雲貌態祇應天
上有歌聲豈合世間聞曾前瑞雪燈斜照眼底挑花酒
半醺不是相如憐賦客肯教容易見文君羣玉解天祿
之任而歸洛陽經二妃廟題云小袁洲北浦雲邊二女
明粧玉儼然野廟向江春寂寂古碑無字草芊芊風迴
日暮吹芳芷月落山深哭杜鵑猶似含顰望巡守九疑

凝黛隔湘川又曰黃陵廟前春已空子規啼血滴松風
不知精爽歸何處疑是行雲秋色中羣玉疑春空遂至
秋色欲易之恍若有物告以二年之兆時尋陽太守段
成式志其事二年後果死於洪井段以詩哭之曰曾話
黃陵事今為白日催老無兒女累誰哭到泉臺

羣玉字文山澧州人裴休觀察湖南厚延致之及為相
以詩論薦授校書郎

杜牧送羣玉赴舉詩曰故人別來面如玉一榻拂雲秋

影中玉貌花紅三百首五陵誰唱兩春風或曰羣玉受相府之知進詩三百篇授麟臺讎校

黃陵廟前莎草春黃陵女兒茜裙新輕舟小楫唱歌去水遠天長愁殺人羣玉賦黃陵廟詩也或曰李遠之作方干經羣玉故居云許直上書難遇主銜冤下世未成翁琴樽劍鶴誰將去惟鏢山齋一樹風

溫庭筠

彥博裔孫與李商隱俱有名號溫李與貴胄裴誠令狐

高等捕飲狎昵為襄陽巡官

郭處士擊甌歌云吉粟金虬石潭古勺陂澹灩幽脩語
湘君寶馬上神雲碎珮叢鈴滿煙雨吾聞三十六宮花
離離軟風吹春星斗稀玉宸冷磬破昏夢木露未乾香
著衣蘭釵委墜垂雲髮小響丁當逐迴雪晴碧煙滋重
疊山羅屏半掩桃花月太平天子駐雲車龍鑪勃鬱雙
蟠拏宮中近臣抱扇立侍女低鬟落翠花亂珠觸續正
跳蕩傾頭不覺金烏斜我亦為君長嘆息緘情遠寄愁

無色莫霑香夢綠揚絲千里春風正無力

陽春曲云雲母空窓晚煙薄香昏龍氣疑輝閣霏霏霧
雨杏花天簾外春寒著羅幕曲攔伏檻金麒麟沙苑芳
郊連翠茵廐馬何能啗芳草路人不敢隨流塵

庭筠才思艷麗工於小賦每入試押官韻作賦凡八义
手而八韻成時號温八义多為隣鋪假手號曰救數人
也而士行玷缺播紳薄之李義山謂曰近得一聯句云
遠比趙公三十六年宰輔未得偶句温曰何不云近同

郭令二十四考中書宣宗嘗賦詩上句有金步搖未能
對遣求進士對之庭筠乃以玉條脫續也宣宗賞焉又
藥名有白頭翁溫以蒼耳子為對他皆類此宣皇愛唱
菩薩蠻詞丞相令狐絢假其修撰密進之戒令勿洩而
遽言於人由是踈之溫亦有言云中書內坐將軍譏相
國無學也宣皇好微行遇於逆旅溫不識龍顏傲然而
詰之曰公非長史司馬之流帝曰非也又曰得非六參
簿尉之類帝曰非也謫為方城尉其制詞曰孔門以德

行為先文章為末爾既德行無取文章何以補焉徒負
不羈之才罕有適時之用竟流落而死杜棕自西川除
淮海廷筠詣韋曲杜氏林亭留詩云卓氏壚前金線柳
隋家堤畔錦帆風貪為兩地行霖雨不見池蓮照水紅
豳公聞之遺絹千疋曾於江淮為親表辱之由是改名
廷筠又改名舉場多為舉人假手沈詢知舉施鋪席授
廷筠不與諸公隣比困於場屋卒無成而終

令狐綯曾以舊事訪於廷筠對曰事出南華非僻書也

或與相公燮理之暇時宜覽古絢益怒奏廷筠有才無
行卒不登第廷筠有詩曰因知此恨人多積悔讀南華

第二篇

廷筠五丈原詩云鐵馬雲雕共絕塵柳陰高壓漢營春
天晴煞氣屯關右夜半長星照渭濱下國卧龍空誤主
中原得鹿不因人象床錦帳無言語從此譙周是老臣
過新豐云一劍乘時帝業成沛中鄉里到咸京寰區已
作皇都貴風月猶含白社情泗水舊亭春草遍千門遺

瓦古苔生至今留得離家恨雞犬相聞落照明

蘇武廟云蘇武魂銷漢使前古祠高樹兩茫然雲邊雁
斷胡天月隴上羊歸塞草煙回日樓臺非甲帳去時冠
劍是丁年茂陵不見封侯印空向秋波哭逝川

周繇

繇字為憲池州人及咸通進士第以明皇夢鍾馗賦知
名弟繁亦工為詩調池之建德令李昭象以詩送曰投文得仕
而今少佩印還家古所榮後以御史中丞與段成式韋

蟾溫庭皓同遊襄陽徐商幕府繇有者牡丹贈段成式
詩云金藥霞英疊彩香初疑少女出蘭房逡巡又是一
年別寄語集仙呼索郎成式前者恠酒絕句贈繇曰太
白東西飛正狂新芻石凍雜梅香詩中反語常迴避尤
恠花前呼索郎

繇又以人參遺成式有詩云人形上品傳方志我得真
英自紫團慙非叔子空持藥更請伯言審細者

式求人參詩曰

少賦令才猶強作衆醫多失不能呼
九莖仙草真難得五葉靈根許惠無

襄陽中堂賞花繇與妓人戲語成式嘲之曰鶯裏花前
選孟光東山逋客酒初狂素娥畢竟難防備燒得河車
莫遣嘗繇和云迴簪轉黛喜猜防粉署裁詩助酒狂若
遇仙丹偕羽化便隨簫史亦何傷

成式不赴光風亭夜宴贈繇云屏開屈膝見吳娃蠻臘
同心四照花姝女不愁難管領斬新鉛裏得黃牙繇和
云玉樹瓊筵映彩霞澄虛樓閣似仙家只緣存想歸蘭
室不向春風看夜花

廣陽公宴成式速罷馳騁坐觀花艷或有眼飽之嘲絲
賦詩云感鞠且徒為寧如目送時報讎慙選奕存想恨
逶遲促坐疑辟咀啣孟強忍願恣情窺窈窕曾恃好風
姿色授應難奪神交願莫辭請君看曲譜不負少年期
段成式和并序云近者初開金埒大敞紅筵騎歷塊而
風生鼓摻搗而雷發成式未曾盤馬徒效執鞭喜過君
子之營徒接將軍之地以款段辭退因得坐觀是時滿
目鈞黃逆鼻蘭麝晚薪餘論有恨織素而不憐斜柯新

知歎因針而難假化符端公妾換名馬賦關長門莫逆
賞心形於善謔為憲老舅吟飄白雪思効碧雲六韻傳
觀不得落地鏗如佩玉粲若列星儼眼詎貴於千金貸
心只勞於一句輒鳴瓦釜方應金鏡拗拙宜哈足代諧
笑詩云才甘魚目並藝怯馬蹄間王謝初飛蓋姬姜盡
下山縛雞難角逐射雉豈開顏亂翠移林色狂紅照座
殷防拔齒雖在乞帽鬢慙斑儻恕相如瘦應容累騎還
庭筠和云齊馬馳千駟盧姬逞十三玳筵方盼眄金勒

自趁趨墮珥情初洽鳴鞭戰未酣神交花苒苒眉語柳
穆穆柳吳興云窓
踈眉語度却畧青鸞鏡翹翻翠鳳簪專城有佳
對寧肯顧春蠶

乾
健
山
寶
寶
寶

唐詩紀事卷五十四

欽定四庫全書

集部

唐詩紀事卷五十五至
七

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣楊其梓

謄錄監生臣劉能

欽定四庫全書

唐詩紀事卷五十五

宋 計敏夫 撰

周墀

王起

盧肇

丁稜

姚鵠

高退之

孟球

劉耕

裴翻

樊驥

崔軒

蒯希逸

林滋

李宣古

黃頤

張道符

邱上卿

石貫

李潜

孟守

唐思言

左牢

金厚載

王甚夷

周墀

武宗會昌三年王起僕射再主文柄起自長慶至此凡
三領貢籍墀時刺華州以詩寄賀云文場三化魯儒生
三十餘年振重名曾忝木雞誇羽翼又陪金馬入蓬瀛

墀初年木雞賦及第常陪僕射守職內庭雖欣月桂居先折更羨春蘭寂後

榮欲到龍門看風雨關防不許暫離營

和者列姓名於後

誦李常侍立秋日奉詔祭嶽見寄云秋祠靈嶽奉樽罍
風過深林古栢開蓮掌月高珪幣列金天雨露鬼神陪

質明三獻雖終禮祈壽千年別上杯豈是瑣才能祀事

宏農太守主張來

常侍李景遜也
亦曾知華州

墀字德升汝南人長史學屬辭高古武宗時刺華州召
為兵部侍郎遂為宰相以議河湟事不合指罷鄭顥言
於帝曰世謂墀以直言相亦以直言免帝悟加拜右僕
射

王起

和周侍郎見寄云貢院離來二十霜誰知更忝主文場

揚葉縱能穿舊的，桂枝何必愛新香。九重每憶同僊禁，
六義初吟得夜光。莫道相知不相見，蓮峰之下欲徵黃。
張籍喜起放榜詩云：東風時節近清明，車馬爭來滿禁城。
二十八人初上榜，百千萬里盡傳名。誰家不惜花園看，
在處多將酒器行。共賀春司能鑒識，今年應合有公卿。

勅下後人置皮袋例以圖章酒器錢絹寶之逢花即飲

太和中文宗重之曾為

詩寫于太子之笏，武宗嘗以乃方二字問之，起曰：羣書未之見也。周穆王有魯齋二字，百儒但言古馬名於今。

未詳臣所不識者惟此八駿圖中三五字而已帝曰知
卿夙學偶相試爾

起字舉之元和末為中書舍人穆宗時錢徽坐貢舉失
實貶詔起覆核起建言以所試送宰相閱可否然後付
有司議者謂起失職李訓為相起門生也引與共政文
宗上文好古學時鄭覃以經術進起以該博顯武宗時
自東都召為尚書判太常卿帝患選士不得才特命起
典貢舉凡四舉士皆知名者人伏其鑒慈恩寺題名云

進士題名自神龍之後過闕宴後率皆期集於慈恩塔
下題名故貞元中劉太真侍郎試慈恩寺望杏園花發
詩會昌三年贊皇公為上相其年十一月十九日勅諫
議大夫陳商守本官權知貢舉後因奏對不稱旨十二
月十七日宰臣遂奏依前命左僕射兼太常卿王起主
文二十二日中書覆奏奉宣旨不欲令及第進士呼有
司為座主趨附其門無題名局席等條疏進來者伏以
國家設文學之科求貞正之士所宜行崇風俗義本君

親然後升於朝廷必為國器豈可懷賞拔之私惠忘教化之根源自謂門生遂成膠固所以時風寢壞臣節何施樹黨昔公靡不由此臣等商量今日已後進士及第任一度參見有司向後不得聚集參謁及於有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自為宴樂並無所禁唯不得聚集同年進士廣為宴會仍委御史臺察訪聞奏謹具如前奉勅宣依於是向之題名各盡削

去蓋贊皇公不由科第故設法以排之洎公失意悉復舊態

李德裕為秘書校書有雨中自秘書歸訪王御史

時起為監

察御史集賢直學士

知早入朝便入集賢不遇詩起和之序云起

項任集賢校書及升栢堂又與秘閣相對今直書殿有張學士嘗忝同幕而與秘書稍遠故瞻望之詞多詩云台庭才子來款扉典校初從天祿歸已慙陋巷迴玉趾仍聞細雨占綵衣詰朝始趨鳳闕去此日遂歎雞黍違

憶昨謬官在烏府喜君對門討魚魯直廬相望夜每闌
高閣遙臨月時吐昔聞三入承明廬今來重入中秘書
校文復忝丞相屬博物更與張侯居新冠峨峨不變鐵
舊泉脉脉猶在渠忽在情人吐芳訊臨風不羨潘錦舒
憶見青天霞未卷吟翫瑤華不知晚自憐豈是風引舟
如何漸與蓬山遠

樂天惜玉藥花懷集賢王校書云芳意將闌風又吹白
雲離葉雪辭枝集賢讎校無閑日落盡瑤花君不知

盧肇

嵩高降德為時生
洪筆三題造化名
鳳詔佇歸專北極
驪珠搜得盡東瀛
褒衣已換金章貴
禁掖曾隨玉樹榮
明日定知同相印
書衿新列柳間營

自肇至王甚夷各
和主司王起一章

多用
起韻

開成初就江西解試為試官末送肇謝曰巨黿負鼉首
冠蓬山試官曰某恨人數擠排深慙名第奉浼何云首
冠肇曰碩石處上巨黿戴之豈非冠耶

張祐於甘露寺觀肇詩曰不謂三吳經此詩也祐曰日
月光先到山河勢盡來肇曰地從京口斷人自海門回
因而仰伏

肇初計偕至襄陽竒章公方有真珠之感肇賦詩曰神
女初離碧玉塔彤雲猶擁牡丹鞋知道相公憐玉腕強
將纖手整金釵

肇字子發袁州人也初登第或問所由來曰肇袁民也
或曰袁州出舉人耶肇曰袁州出舉人亦猶沅江出龜

甲九肋者蓋稀矣肇筮仕之初為鄂岳盧商從事其後
江陵節度裴休太原節度盧簡求奏為門吏後除著作
郎遷倉部外郎充集賢院直學士咸通中出知歙州肇
競渡詩云石溪久住思端午館驛樓前看發機鞞鼓動
時雷隱隱獸頭凌處雪微微衝波突出人齊噉躍浪爭
先鳥退飛向道是龍剛不信果然奪得錦標歸

咸通初恩除歙州途中寄座主王侍郎詩云忽忝專城
奉六條自憐出谷屢遷喬駟車雖覺還家近捧日惟愁

去國遙朱戶昨經新祭戟風帆常覺戀簞瓢江天夜夜
知消息長見台星在碧霄

丁稜

公心獨立副天心三轄春闈冠古今蘭署門生皆入室
蓮峰太守別知音同升翰苑時名重遍歷朝端主意深
新有受恩江海客坐聽朝夕繼為霖李德裕嘗左官宜
春盧肇以文見知既拜相舊例放榜先呈宰相王起問
德裕所欲答曰何問為如盧肇丁稜姚鵠豈可以不與

及第起遂依次放之

唐放榜訖謁宰相即榜元致詞肇以故不至稜口吃而形陋俛曰稜等登鞠躬頰汗卒不能致後語左右皆笑或曰君善爭耶稜猶不悟也稜字子威

姚鵠

三年竭力向春闈塞斷浮花衆路岐盛選棟梁稱昔日平均雨露及明時登龍舊美無斜徑折桂新榮盡直枝莫道只陪金馬貴相期更在鳳凰池

鵠尋趙尊師不遇詩云羽客朝元晝掩扉林中一逕霧
中微松陰遶院鶴相對山色滿樓人未歸盡日獨思風
馭返寥天幾望野雲飛憑高目斷無消息自醉自吟愁
落輝

鵠字居雲

高退之

昔年桃李已滋榮今日蘭蓀又發生葑菲采時皆有道
權衡分處且無情叨陪鴛鴦朝天客共作門闌出谷鶯

何事感恩偏覺重忽聞金榜扣柴荆退之自顧機務始不敢有叨竊之望

策試之後遂歸王屋山居不期一旦進士及第遣人賫榜扣關相報方知之矣

退之字遵聖

孟球

當年門下化龍成今日餘波進後生仙籍共知推麗藻

禁垣同得薦嘉名桃蹊早茂誇新萼菊圃初開耀晚英

誰料羽毛方出谷許教齊和九臯鳴

球字廷玉

劉耕

孔門頻建鑄顏功紫綬青衿感激同一簣勤勞成太華
三年恩德仰維嵩揚隨前輩穿皆中桂許平人折欲空
慙和周郎應見顧咸知大造竟無窮

裴翻

常將公道選羣生猶被春闈屈重名文柄久持殊歲紀
恩門三啓動寰瀛雲霄幸接駕鸞盛變化欣同草木榮
乍得陽和如細柳參差長近亞夫營

翻字雲章

樊驤

滿朝簪髮半門生又見新書甲乙名
孤進自今開道路至公依舊振寰瀛
雲飛太華清詞著花發長安白屋榮
忝受恩光同上客惟將報德是經營

驤字元龍

崔軒

滿朝朱紫半門生新榜勞人又得名
國器舊知收片玉

朝宗轉覺集登瀛同升翰苑三年美繼入花源九族榮
共仰蓮峰聽雪唱欲賡僊曲意怔營

軒字鳴嵐

蒯希逸

一振聲華入紫微三開秦鏡照春闈龍門舊列金章貴
鶯谷新遷碧落飛恩感風雷皆變化詩裁錦繡借光輝
誰知散質多榮忝鴛鴦清塵接布衣

芳草復芳草斷腸還斷腸自然堪下淚何必更斜陽楚

峰千萬里燕鴻三兩行有家歸不得况舉別君觴牡牧
之池州送希逸詩也

武幹者事蒯希逸十餘歲希逸擢第幹辭以親在求去
希逸以詩送之略曰山險不曾離馬後酒醒長見在床
前士人皆有繼和

希逸字大隱

希逸詩蟾蜍醉裏破蛺蝶夢中殘牛相在揚州常稱之

林滋

龍門一變荷生成况是三傳不朽名美譽早聞喧北闕
頽波今見走東瀛駕行既接參差影雞樹仍同次第榮
從此青衿與朱紫升堂侍宴更何營

望九華山詩云茲山突出何恠竒上有萬狀無凡姿大
者嶙峋若奔兕小者巒嵬如嬰兒玉柱金莖相拄枝干
空踰碧勢參差虛中始訝巨靈擘斗處乍驚愚叟移蘿
煙石月相蔽虧天風裊裊猿呶呶龍潭萬古噴飛溜虎
穴幾人能得窺吁予比年愛靈境到此始覺魂神馳如

何獨得百丈索直上高峰拋俗羈

滋字後象

李宣古

恩光忽逐曉春生金榜前頭忝姓名
三感至公裨造化重揚文德振寰瀛
行為霖雨曾相賀半在雲霄覺更榮
何處新詩添照灼碧蓮峰下柳間營

宣古常賦寒食日亥時云人定朱門尚未開
初星粲粲照人回此時寒食無燈燭
花柳蒼蒼月欲來

杜司空惊自忠武軍節度使出鎮澧陽宣古數陪遊宴
乘醉慢侮惊欲辱之長林公主曰豈有飲而舉人細過
耶謂宣古請為詩冀彌縫也宣古得韻立成詩曰紅燈
初上月輪高照見堂前萬朶桃膚栗調清銀字管瑟瑟
聲亮紫檀槽能歌姹女顏如玉解引蕭郎眼似刀爭奈
夜深拋耍令舞來接去使人勞

宣古字垂後

冉冉池上煙盈盈池上柳生貴非道傍不斷行人手句

翠蓋不西來池上天池歌句右張為取作主客圖

黃頰

二十二年文教主三千上士滿皇州獨陪宣父蓬瀛奏
方接顏生魯衛遊多羨龍門齊變化屢看鷄樹第名流
升堂何處取榮美朱紫環鑄幾處酬

頰為失第後久方第撫言曰黃頰以洪奧文章蹉跎者
一十三載劉纂以平漫子弟而折丹桂由斯言之可謂
命通性能豈曰性能命通者歟韓愈自潮州量移宜春

郡頗學愈為丈亦振大名頗常觀盧肇為碑版則唾之
而去頗宜春人與肇同鄉頗富而肇貧同日遵路赴舉
郡牧餞頗離亭肇駐蹇十里以俟明年肇以第一名還
袁因競渡即席賦詩云向道是龍剛不信果然奪得錦
標歸

頗字無頗

張道符

三開文鏡繼芳聲暗暗雲霄接去程會厭洪波先得路

早陞清禁共垂名蓮峰對處朱輪貴金榜傳時玉韻成
更許下才聽白雪一枝今過卻詵榮

道符字夢錫

邱上卿

常將公道選諸生不是鴛鴻不得名天上宴回聯步武
禁中麻出滿寰瀛簪裾盡過前賢貴門館仍叨舊學榮
看著鳳池相繼入都堂那肯滯關營

上卿字陪之

石貫

重德由來為國生五朝清顯冠公卿風波久佇濟川楫
羽翼三遷出谷鶯絳帳青衿同日貴春蘭秋菊異時榮
孔門弟子皆賢哲誰料窮儒忝一名

賈字惣之

李潜

文學宗師心秤平無私三用佐貞明恩波舊是仙舟客
德字新添月桂名蘭署崇資金色重蓮峰高唱玉音清

羽毛方荷生成力難繼鸞鳳上漢聲

潛字德隱宜春人

孟守

科文又主守初時光顯門生濟會期美擅東堂登甲乙
榮同內署待恩私羣鸞共喜新遷木雙鳳皆當即入池
別有陪深知感士曾經兩度得芳枝

守字處中長慶三年王起放及第為時相所退是年大
和主和戎至會昌三年起以左揆再知貢舉守龍鍾就

試成名是歲石雄入塞公主自蕃還京

唐思言

儒雅皆傳德教行幾崇浮俗贊文明龍門昔上波濤遠
禁署同登渥澤榮虛散謬當陪杞梓後先寧異感生成
時方側席徵賢急况說詩謠近帝京

左宰

聖乾文德最稱賢自古儒生少比肩再啓龍門將二紀
兩司鶯谷已三年蓬山皆美成榮貴金榜誰知忝後先

金史卷之八十一
卷五十五
正是感恩流涕日但思旌旆碧峰前

牢字德膠

金厚載

長慶曾收間世英果居臺閣冠公卿天書再受恩波遠
金榜三開日月明已見差肩趨翰苑更期連步掌台衡
小儒謬跡雲霄路心仰蓮峯望太清

厚載字化光

王甚夷

春闈帝念主生成長慶公聞兩歲名有詔赤心分雨露
無私和氣浹寰瀛龍門乍出難勝幸鴛侶先行是取榮
遙仰高峰看白雪多慙屬和意屏營
甚夷字無黨

唐詩紀事卷五十五

欽定四庫全書

唐詩紀事卷五十六

宋 計敏夫 撰

鄭畋

李彙征

劉威

崔郊

譚銖

郭夔

來鵬

來鵠

鄭洪業

杜牧

許渾

童翰卿

雍陶

周元範

李遠

朱可名

趙嘏

祝元膺

韋承貽

鄭史

韋楚老

鄭畋

馬嵬太真縊所題詩者多悽感鄭畋為鳳翔從事日題
云肅宗回馬揚妃死雲雨雖亡日月新終是聖朝天子
事景陽宮井又何人觀者以為有宰輔之器

中秋月直禁苑云禁署方懷忝綸闈已再加暫來西掖
路還整上清槎恍惚歸丹地深嚴宿絳霞幽襟聊自適
閑弄紫薇花

懿宗朝韋保衡路嵩忌宰相劉瞻誣以罪黜為荆南節
度畋為制詞云早以文學疊中殊科風稜甚高恭謹無

玷又云安數畝之居仍非已有却四方之賄唯恐人知
韋路大怒貶畋為梧州刺史責劉驩州司戶命舍人李
庶為詞深文痛詆必欲加害屬懿宗厭代僖宗立蕭倣
輔政舉瞻自代召歸朝廷至湖南庶典是郡出迎江次
牌亭致酒瞻唱竹枝詞送庶酒云躡屐過溝竹枝恨君
深女兒瞻命庶酬和庶曰不閑音律瞻曰君應只解為
制詞也是夕庶飲觥而卒畋字台文相僖宗昭宗為人
仁恕姿采如峙玉

畋為渭南尉日嘗有題維山王子晉廟詩曰自昔靈王
子吹笙遡沆寥六宮攀不住三島去相招亡國原陵古
賓天歲月遙無蹊窺海曲有廟訪山椒石帳龍蛇拱雲
龍彩翠銷露壇裝琬琰真像寫松喬珠館青童宴琳宮
阿母朝氣輿仙女侍天馬吏兵調湘妓紅絲瑟秦郎白
管簫西城要婢約南嶽命嬌婉句曲觴金洞天台嘯石
橋晚花珠弄藥春茹玉生苗二景神光秘三元寶籙饒
霧垂鴉翅髮冰束虎章腰鶴馭爭銜箭龍妃合獻綃衣

從星渚沆丹就日宮燒物外花常滿人間葉自凋望臺
悲漢戾闕水笑梁昭古殿香殘地荒堦柳長條幾曾期
七日無復降重霄嵩嶺連天漢伊瀾入海潮何由得真
訣使我佩環飄

李景征

景征客遊閩越至循州冒雨求宿或指韋氏莊居韋氏
杖屨迎賓年八十餘自稱曰野人韋思明每與李生談
論或詩或史淹留累夕景征善談而不能屈也論數十

家之作次第至李涉詩主人酷稱善彙征遂吟曰遠別
秦城萬里遊亂山高下出商州關門不鎖寒溪水一夜
潺湲送客愁又曰華表千年一鶴歸丹砂為頂雪為衣
泠泠仙語人聽盡却向五雲翻翅飛思明復吟二篇曰
因韓為趙兩遊秦十月冰霜渡子孟津縱使鷄鳴見關吏
不知余也是何人又曰滕王閣上唱伊州二十年前向
此遊半是半非君莫問西山長在水長流韋叟愀然變
色曰老身弱齡不肖遊浪江湖交結姦徒為不平事後

遇李涉博士蒙簡此詩因而跼跡李公待愚擬陸士衡
之薦戴若思中心藏焉遂隱羅浮經于一紀李既云亡
不復再遊秦楚追惋今昔或潛然持觴而酌反袂而歌
云春雨蕭蕭江上村綠林豪客夜知聞他時不用相迴
避世上如今半是君乾符辛丑歲范攄客于雲川值彙
征細述其事云於韋叟之居觀李博士之手翰云
彙征後登進士第

劉威

遊東湖處士園林詩云偶向東湖更向東
數聲鷄犬翠微中
遙知楊柳是門處
似隔芙蓉無路通
樵客出來山帶雨
漁舟過去水生風
物情多與閑相稱
所恨求安計不同

七夕云烏鵲橋成上界通
千年靈會此霄同
雲收喜氣星樓晚
香拂輕塵玉殿空
翠輦不行青草路
金鸞徒候白榆風
綵盤花閣無窮意
只在浮生一縷中
威會昌時詩人也

崔郊

郊寓居漢上有婢端麗善音律既貧鬻婢於連帥給錢
四十一萬寵盼彌深郊思慕無已其婢因寒食來從事
家值郊立於柳陰馬上漣泣誓若山河崔生贈之以詩
曰公子王孫逐後塵綠珠垂淚滴羅巾侯門一入深如
海從此蕭郎是路人或有嫉郊者寫詩於座公觀詩令
召崔生左右莫之測也及見郊握手曰侯門一入深如
海從此蕭郎是路人便是公作耶遂命婢同歸至於幃

幌奩匣悉為增飾之

譚銖

題九華山詩云憶聞九華山尚在童稚年浮沉任名路
窺仰會無緣罷職池陽時復遭迎送牽因茲契誠願矚
望枕席前况值春正濃氣色無不全或如碧玉靜或似
青靄鮮或接白雲堆或映紅霞天呈姿既不一變態何
啻千魏我本無動崇峻性豈偏外景自隱隱潛虛固幽
玄我來暗凝情務道志更堅色與山異性性併山亦然

境變山不動性存形自遷自遷不阻俗自定不失賢浮
華與朱紫安可迷心田

真娘者葬吳宮之側行客賦詩多矣銖書一絕題者遂
止詩曰武邛山下冢累累松栢蕭條盡可悲何事世人
偏重色真娘墓上獨題詩

咸通末鄭渾為蘇州都郵銖為醴院官鍾輻為院巡皆
廣文生時湖州牧李超趙蒙為代皆狀元時語曰湖接
兩頭蘇聯兩尾

卷五十六
銖吳人登會昌進士第

郭夔

九華山詩云巖翠凌空出迥然岩窅萬丈倚秋天暮風
飄送當軒色曉霧斜飛入檻煙簾捲倚屏雙影聚鏡開
朱戶九條懸畫圖何必家家有自有畫圖來目前
夔大中時江南進士也

來鵬

清明日與友人遊玉粒塘庄詩曰幾宿春山逐陸郎清

明時節好煙光歸穿細荇船頭滑醉踏殘花屐齒香風
急嶺雲翻迥野雨餘田水落方塘不堪吟罷東回首滿
耳蛙聲正夕陽

鄂渚清明日與鄉友登頭陀山云冷酒一盃相勸頻異
鄉相遇轉相親落花風裏數聲笛芳草煙中無限人都
大此時深悵望豈堪高境更逡巡思量費子真仙子不
作頭陀山下塵

寒食山館書情云獨把一盃山館中每經時節恨飄蓬

侵塔草色連朝雨滿地梨花昨夜風蜀魄笑來春寂寞
楚囚吟後月朦朧分明寄得還家夢徐孺宅前湖水東
鄂渚除夜書懷云鸚鵡洲頭夜泊船此時形影共悽然
難歸故國干戈後欲告何人雨雪天筋撥冷灰書悶字
枕陪寒席帶愁眠自嗟落拓無成事明日春風又一年
鵬詩思清麗福建韋尚書岫愛其才欲以子妻之而不
果後遊蜀夏課卷中有詩云一夜綠荷風剪破賺他秋
雨不成珠識者以為不祥是歲隨秋賦而卒

岫者丹
之子也

來鵠

聖政紀頌序曰穆宗皇帝臨朝與羣臣言及政事宰臣請史官執筆當羣臣奏事隨日撰錄號為聖政紀至上之即位三年有鄉校小臣來鵠因窺穆宗實錄追而為之頌曰三皇不書五帝不紀有聖有神風銷日已何教何師生來死止無曲無法頑肩冓比三皇實作五帝實治成天造地不昏不圯言得非排文得聖齒表表如見者莫若乎史是知朴繩休結正簡斯若君誥臣箴觚編

毫絡前書後經窺善鑒惡國之大章如何寢略嗚呼貞
觀多吁永徽多俞廷日發論殿日發謨牙孽不作烏鼠
不除論出不蓋謀行不紆楹然史臣蛇然史裾瞠瞠即
視逶逶而窶翹筆當面決防納污不枯爾智不息我愚
執言直注史文直敷故得粲粲朝典落落廷譽聖牘既
多堯風不淺頌編坦軸君出臣顯若儼見旒若俯見冕
無閉殿曠廷無尸安素宴三皇不忘五帝不剪太宗得
之史焉斯展暨乎後相圖身天子專問我獨以言史不

得近邛明見嫵倚相在擯秉筆如今隨班不進班退史
歸惘然疇依奏問莫覩嘉謀固稀取彼誥命祿為國肥
炯然時皇言必成章德宣五帝道與三皇如何翊臣嚙
肉嗜盍甯距磨扶福衡拘長控截僚位占護陽光垣私
藩已遠史度唐俾德音嘉訪默縮暗亡咽典噤法蓋聖
寵昌昌以至此史文不張後必非笑將來否滅謂乎殿
空宸逸朝慵廷荒不知姦蔽文失汪洋有貞觀業有永
徽綱亦匿匪見亦寢匪彰賴有後臣斯言不佞伊尹直

心太甲須聖事既可書史何不命乃具前欺大陳不敬
曰逐史之喻請以物並且十夫樹揚一夫欲競裁既未
牢拊豈能盛帝業似裁逐史似拊穆宗憮然若疾若營
昔何臣斯隱我祖正不傳親問不寫密諍孰示來朝以
光神政由是天呼震吸徵奔召急史提筆來叱廷而入
端耳抗目不撓不挹獬豸側頭螭蚪擺溼握管絕怡當
殿而立君也盡問臣也倒誠磊磊其事鏗鏘其聲大何
不顯細何不明語未絕緒史已錄成謂之何書以政紀

名伊紀清芬可昭典墳古師官烏昔聖官雲方之我后
錄里書分錄有君法書有君文君法君文在聖政紀云
殿無閑時廷無曠日雲諏波訪倦編刊筆君劬臣勞上
討下述惟勤惟明在聖政紀出至德何比至教焉如孰
窺孰測外夷內儲謂君有道乎臣有謨歟有道有謨在
聖政紀書一體列秩同力翼戴祈福去邪絕防無礙國
章可披唐文可愛善咨不偷嘉論不蓋不偷不蓋在聖
政紀載諒夫總斯不朽可懸魏闕愚得是言非訟非伐

實謂鑿臣沈渾開君日月妖物零死天文光發惟我之
有頌兮奚斯躍而董狐廢

鵠豫章人師韓柳為文大中咸通間聲價籍甚

鄭洪業

詔放雲南子弟還國詩云德被陪臣子仁垂聖主恩雕
題辭鳳闕丹服出金門有澤沾殊俗無征及獷獠銅梁
分漢土玉璽駕鸞軒瘴嶺蠶叢盛巴江越雋垠萬方同
感化豈獨自南蕃

洪業咸通八年鄭愚下第一人擢第

杜牧

牧為御史分務洛陽時李司徒愿罷鎮閑居聲妓豪侈
洛中名士咸謁之李高會朝客杜持憲不敢邀致杜遣
座客達意願預斯會李不得已邀之杜獨坐南行瞪目
注視引滿三卮問李云聞有紫雲者孰是李指之杜凝
睇良久曰名不虛得宜以見惠李俯而笑諸妓亦回首
破顏杜又自飲二爵朗吟而起曰華堂今日綺筵開誰

喚分司御史來忽發狂言驚滿座兩行紅粉一時迴氣
意閑逸傍若無人牧不拘細行故詩有十年一覺揚州
夢唯有青樓薄倖名吳武陵以阿房宮賦薦於崔郾遂
登第郾東都放榜西都過堂牧詩曰東都放榜花未開
三十三人走馬迴秦地少年多釀酒即將春色入關來
牧佐宣城幕遊湖州刺史崔君張水戲使州人畢觀令
牧間行閱竒麗得垂髫者十餘歲後十四年牧刺湖州
其人已嫁生子矣乃悵而為詩曰自是尋春去較遲不

須惆悵怨芳時狂風落盡深紅色綠葉成陰子滿枝

杜秋娘詩序曰杜秋金陵女也年十五為李錡之妾後錡叛滅籍之入宮有寵於景陵穆宗即位秋為皇子傅姆皇子壯封漳王鄭注用事誣丞相欲去異已者指王為根王被罪廢削秋因賜歸故鄉予過金陵感其窮且老為之賦詩曰京水清滑生女白如脂其間杜秋者不勞朱粉施老淖即山鑄後庭千娥眉秋持玉罈飲與唱金縷衣

勸君莫惜金縷衣勸君須惜少年時花開堪折直須折莫待無花空折枝李錡長唱此詞

溥既白首叛秋亦紅淚滋吳江落日渡灞岍綠楊垂聯
裾見天子盼眄獨依依椒壁懸錦幕鏡奩蟠蛟螭低鬟
認新寵窈窕復融怡月上白璧門挂影涼參差金階露

新重閑捻紫簫吹

晉書盜開涼州張駿塚得紫玉簫

莓苔夾城路南苑

鴈初飛紅粉羽林仗獨賜辟邪旗歸來煮豹胎饜飫不
能飴咸池昇日慶銅雀分香悲雷音後車遠事往落花
時鷺襟得皇子壯髮綠綵綵畫堂授傅姆天人親捧持
虎睛珠絡祿金盤犀鎮幃長揚射熊羆武帳弄啞啞漸

拋竹馬劇稍出舞鷄竒
嶄嶄整冠佩侍宴坐瑤池眉宇
儼圖畫神秀射朝輝一尺桐偶人江充知自欺王幽茅
土削秋放故鄉歸觚稜拂斗極回首尚遲遲四朝三十
載似夢復疑非潼關識舊吏毛髮已如絲却喚吳江渡
舟人那得知歸來四鄰改茂苑草菲菲清血灑不盡仰
天知問誰寒衣一疋素夜借鄰人機我昨金陵過聞之
為歔歔自古皆一貫變化安能推夏姬滅兩國逃作巫
臣姬西子下姑蘇一舸逐鴟夷織室魏豹俘作漢太平

基悞置代籍中兩朝尊母儀光武紹高祖本係生唐兒
珊瑚破高齊作婢春黃糜蕭后去揚州突厥為闕氏女
子固不定士林亦難期射鈞後呼父釣翁王者師無國
要孟子有人毀仲尼秦因逐客令柄歸丞相斯安知魏
齊首見斷箒中屍給喪屨張葦廊廟冠峨危珥貂七葉
貴何妨戎虜支蘇武却生返鄧通終死饑主張既難測
翻復亦相宜地盡有何物天外復何之指何為而捉足
何為而馳耳何為而聽目何為而窺己身不自曉此外

何思惟因傾一樽酒題作杜秋詩愁來獨長詠聊可以
自怡牧初自宣城幕除官入京有詩留別云同來不得
同歸去故國逢春一寂寥後二十餘年連典四郡自湖
州拜中書舍人題汴河云自憐流落西歸疾不見春風
二月時至京果卒或曰舍人未為流落而遽及之魄已
喪矣

煙着樹姿嬌雨餘山態活句四海一家無一事將軍携
劍泣霜毛句山密夕陽多人稀芳草遠句仙掌月明孤

影過長門燈暗幾聲來句右張為取為主客圖

清時有味是無能閑愛孤雲靜愛僧欲把一麾江海去
樂遊原上望昭陵牧赴吳興登樂遊原之作

骨清年少眼如冰鳳羽參差五色層天上騏驎時一下
人間不獨有徐陵贈李秀才

青山隱隱水搖搖秋盡江南草木凋二十四橋明月夜

玉人何處學吹簫寄揚州韓綽判官

楚鄉寒食橘花時野渡臨風駐綵旗草色連雲人去住

水紋如縠燕參差

江上

蟬蛄寧與雪霜期
賢哲難教俗士知
可憐貞觀太平後

天且不留封德彝

題魏
交正

長空澹澹孤鳥沒
萬古消沉向此中
看取漢家何事業

五陵無樹起秋風

登樂
遊原

登池州九峰樓寄張祜
云百感衷來不自由
角聲孤起夕陽樓
碧山終日思無盡
芳草何年恨即休
曉在目前人不見
道非身外更何求
誰人得似張公子
千首詩輕

萬戶侯

過華清宮云長安迴望綉成堆
山頂千門次第開
一騎紅塵妃子笑
無人知道荔枝來
又云新豐綠樹起紅埃
數騎漁陽探使迴
霓裳一曲千峰上
舞破中原始下來
李義山作杜司勳詩云高樓風雨歎斯文
短翼差池不及羣
刻意傷春復傷別人間
唯有杜司勳
又云杜牧司勳字牧之
清秋一首杜秋詩前身應是梁江摠
名總還曾字總持
心鐵已從干鎖利
鬢絲休嘆雪霜垂
漢江遠

吊西江水羊祜韋丹盡有碑

時杜春
撰韋碑

許渾

祇命南海至廬陵逢表兄軍倅奉使淮海別後却寄云
蘆橘花香拂釣磯佳人猶舞越羅衣三洲水淺漁來少
五嶺山高鴈到稀客路晚依紅樹宿鄉關暗望白雲歸
交親不念征南吏昨夜風帆去似飛

金陵懷古云玉樹歌殘王氣終景陽兵合戍樓空松楸
遠近千官塚未忝高低六代宮石燕拂雲晴亦雨江狔

吹浪夜還風英雄一去豪華盡惟有青山似洛中

登故洛陽城云禾黍離離半野蒿昔人城此豈知勞水
聲東去市朝變山勢北來宮殿高鴉噪暮雲歸古堞鴈
迷寒雨下空壕可憐緱嶺登仙子猶自吹笙醉碧桃

咸陽西樓晚望云一上高城萬里愁薰葭揚柳似汀洲
溪雲初起日沉閣山雨欲來風滿樓烏下綠蕪秦苑夕
蟬鳴黃葉漢宮秋行人莫問前朝事渭水寒聲晝夜流
杜牧之有許七侍郎棄官東歸瀟洒江南高秋企望寄

贈之詩云天子綉衣吏東吳美退居有園同庾信避事
學相如蘭畹晴香嫩筠溪翠影踈江山九秋後風月六
朝餘錦帙開詩軸青囊結道書霜嚴紅薜荔露沼白芙
蕖睡雨高梧密棋燈小閣虛凍醪元亮秫寒鱠季鷹魚
塵意迷今古雲情識卷舒他年雪中棹陽羨訪吾廬

榮於

興義縣近
有水榭

又初春雨中舟次和橫江裴使君見迎李趙二秀才同
來因書四韻兼寄江南許渾云芳草渡頭微雨時萬株

楊柳拂波垂蒲根水暖鴈初落梅逕香寒蜂未知辭客
倚風吟暗淡使君迴馬濕旌旗江南仲蔚多情調悵望
清陰幾首詩

渾記夢詩序云余常夢登山有宮室凌雲人云此崑崙
也既入見數人方欲招之至暮而罷詩云晚入瑤臺露
氣清坐中唯有許飛瓊塵心未盡俗緣在十里下山空
月明或云改第二句為天風飛下步虛聲

韋莊讀渾詩云江南才子許渾詩字字清新句句奇十

斛真珠量不盡
惠休虛作碧雲詞

渾睦州人字用晦
園師之後大中三年任監察御史以疾乞東歸終郢睦二州刺史

水聲東注市朝變
山勢北來宮殿高
草生宮闕國無主
玉樹後庭花為誰
何郎翠鳳雙飛去
三十六宮聞玉簫
句經年未葬家人散
昨日因齋故吏來
句垂釣有深意
望山多遠情

右張為取為主客圖

童翰卿

省試昆明池織女石詩云一片昆明石千秋織女名向
風長脉脉臨水更盈盈有臉蓮同笑無心鳥不驚岼雲
連鬢濕沙月對眉生苔作輕裙色波為促杼聲還如明
鏡裏形影自分明

翰卿又有句云大朴逐物盡哀我天地功爭得榮辱心
洒然歸西風

張為取作主客圖

雍陶

詠雙白鷺云雙鷺應憐水滿池風飄不動頂絲垂立當
青草人先見行傍白蓮魚未知一足獨拳寒雨裏數聲
相叫早秋時林塘得爾須增價況是詩家物色宜

杜元穎為西川節度使治無狀文宗大和三年南詔蠻
嗟巔乃悉衆掩攻戎雋三州陷之入成都止西郛十日
掠女子玉貨數萬而南至大渡河謂華人曰此吾南境
爾去國當哭衆號慟赴水死者十三故陶賦蜀人為南

蠻俘虜詩云但見城池還漢將豈知佳麗屬蠻兵錦江
南渡聞遙哭盡是離家別國聲又賦過大渡泣望鄉國
詩云大渡河邊蠻亦愁漢人將渡盡回頭此中郵寄思
鄉淚南去應無水北流別雋州一時慟哭雲日為之變
色詩云越雋城南無漢地傷心從此便為蠻冤聲一慟
悲風起雲暗青天日下山蠻界不許有悲泣之聲詩云
雲南路出陷河西毒草長青瘴色低漸近蠻城誰敢哭
一時收淚羨猿啼蜀中戰後感事云蜀道英靈地山重

水又回文章四子盛道路五丁開
詞客題橋去忠臣叱馭來
卧龍同駭浪躍馬比浮埃
已謂無妖土那知有禍胎
蕃兵依漢柳蠻旆指江梅
戰後悲逢血燒餘恨見灰
空留犀厭怪無復酒除災
歲積萑宏怨春深杜宇哀
家貧移未得愁上望鄉臺

蜀中經蠻後友人馬艾見寄答云
茜馬渡瀘水北來如鳥輕
幾年朝鳳闕一日破龜城
此地有征戰誰家無死生
人悲還舊里鳥喜下空營
弟姪意初定交朋心尚驚

自從經難後吟苦似猿聲

陶蜀川上第後稍薄親黨其舊雲安劉敬之罷舉歸三峽責陶不寄書曰山近衡陽雖少鴈水連巴字豈無魚陶得詩悻赧乃有狐首之思後為簡州牧自此謝宣城柳吳興賓至則折之閣者亦怠投贄者稀得見有馮道明下第請謁云與員外故舊閣者以道明言啓之及引進陶辭曰與公昧平生何云相識道明云誦員外之詩仰員外之德詩集中日得相見何隔平生也遂吟曰立

當青草人先見行傍白蓮魚未知又曰江聲秋入寺雨
氣夜侵樓又曰閉門客到常疑病滿院花開不似貧陶
聞吟欣狎待道明如曩昔之友君子以雍君矜誇而好
媚馮子匪藝而求知

酬李紉歲除送酒云歲盡貧心事事須就中深恨酒錢
無故人克壽能分送遠客消愁免自沽一夜四乘輕鑿
落五更三點把屠蘇已供時節深珍處况許今朝更挈
壺

陶典陽安送客至情盡橋問其故左右曰送迎之地止
此故橋名情盡陶命筆題其柱曰折柳橋自後送別必
吟其詩曰從來只有情難盡何事名為情盡橋自此改
名為折柳任他離恨一條條

劉夢得洞庭詩云湘江秋月兩相和潭面無風鏡未磨
遙望洞庭山翠小白雲盤裏一青螺

陶亦吟云煙波不動影沉沉碧色全無翠色深疑是水
仙梳洗處一螺青黛鏡中心

陶字國鈞大中八年再自國子毛詩博士出刺簡州姚
合送陶及第歸覲云獻親冬集書比橘復何如此去關
河遠相思笑語踈路尋清壑斷人近白雲居幽石題名
處憑君亦記予

陶河陰新城詩云高城新築壓長川虎踞龍盤氣色全
五里似雲根不動一重如月暈長圓河流暗與溝池合
山色遙將睥睨連自有此來當汴口武牢何用鎖風煙
天津橋春望云津橋春水浸紅霞煙柳風絲拂岼斜翠

輦不來金殿閉宮鶯啣出上陽花

送徐山人歸睦州舊隱云君在桐廬何處住草堂應與
戴家鄰初歸山犬翻驚主久別江鷗却避人終日欲為
相逐計臨時空羨獨行身秋風釣艇遙相憶七里灘西
片月新

賈島送陶入蜀云江山事若諳那肯滯雲南草色分危
磴杉陰近古潭日斜褒谷鳥夏淺雋州蠶吾自疑雙鬢
相逢更不堪

陶題杜子美故居云沙崩水檻鷗飛盡樹壓村橋馬過
遲

唐詩人最重行卷陶首篇上裴度或云耿漳行卷首篇
上第五琦遂指為二子邪正雖然方琦未有曩時上詩
亦何足多怪

周元範

誰云高上煙隨雲依碧落投白公句莫怪西陵風景別鏡湖

花草為先春賀朱慶餘及第及句右張為取作主客圖

元範句曲人

李遠

失鶴詩云秋風吹却九臯禽一片閑雲萬里心碧落有情應悵望青天無路可追尋來時白雪翎尤短去日丹砂頂漸深華表柱頭留語後不知消息到如今

聽話叢臺云有客新從趙地迴自言曾上古叢臺雲遮襄國天邊盡樹遶漳河掌上來絃管變成山鳥弄綺羅留作野花開金輿玉輦無行跡風雨誰知長碧苔

贈寫御容李長史云玉座塵消硯水清龍髯不動彩毫
輕初分隆準山河秀乍點重瞳日月明宮女捲簾皆暗
認侍臣開殿盡遙驚三朝供奉無人敵始覺僧繇浪得
名

張同幽閑鼓吹云宣宗朝令狐綯薦遠為杭州宣皇曰
我聞有遠詩云長日唯銷一局棋豈可以臨郡哉對曰
詩人之言非有實也仍薦遠廉察可任乃俞之宣宗視
遠到郡謝上表左右曰不足煩聖慮也上曰遠到郡無

非時奏章只有此謝上表安知不有情懇乎吾不敢忽也

遠字求古大中時為建州刺史

朱可名

應舉日寄兄弟云廢刈鏡湖田上書紫閣前愁人久委地詩道未聞天不是燒金手徒拋釣月船多慙兄弟意不敢問林泉右張為取作主客圖

可名越州人進士及第終長安

趙嘏

長安秋望云雲物淒涼拂曙流漢家宮闕動高秋殘星
幾點鴈橫塞長笛一聲人倚樓紫艷半開籬菊靜紅衣
落盡渚蓮愁鱸魚正美不歸去空戴南冠學楚囚

獻淮南李僕射云早年曾謁富人侯今日難甘失鵠羞
新諾似山無力負舊思如水滿身流馬嘶紅葉蕭蕭晚
日照長江灑灑秋功德萬重知不惜一言拋得百生愁
開成五年樂和侍郎下三十一人及第時在諒闇率皆

雅飲嘏以詩賀曰天上高高月桂叢分明三十一枝風
滿懷春色向人動遮路亂花迎馬紅鶴馭尚飄雲雨外
蘭堂不在管絃中居然自是前賢事何必青樓倚翠空
宣宗索嘏詩首卷題秦皇云徒知六國隨斤斧莫有羣
儒定是非上不悅

張漬會昌五年陳商下第一人翰林覆考黜之嘏貽漬
詩曰莫向春風送酒盃謫仙真箇是仙才猶堪與世為
祥瑞曾到蓬萊頂上來

杜紫微覽嘏早秋詩云殘星幾點鴈橫塞長笛一聲人
倚樓吟味不已因目嘏為趙倚樓復有贈嘏詩曰今代
風騷將誰登李杜壇灞陵鯨海動翰苑鶴天寒今日訪
君還有意三條冰雪獨來看

嘏曾有詩曰早晚粗酬身事了水邊歸去一閑人果卒
於渭南尉嘏嘗家于浙西有美姬惑之洎計偕會中元
鶴林之遊浙帥窺其姬遂卷有之明年嘏及第因以一
絕箴之曰寂寞堂前日又曛陽臺去作不歸雲當時聞

說沙吒利今日青娥屬使君浙帥不自安遣一介歸之
馥方出關逢於橫水驛姬抱馥慟哭而卒遂葬於橫水
之陽

馥字承祐大中終於渭南尉

一千里色中秋月十萬軍聲半夜潮

錢塘句

梁王舊館已

秋色珠履少年輕綉衣白滿樓春色傍人醉半夜雨聲
前計非句三千宮女自塗地十萬人家如洞天

送人尉江都司

右張為取作主客圖

祝元膺

送高遂赴舉云句曲舊宅真自產日月英既涵嶽瀆氣
安無神仙名松桂邈逸色與君相送情

又寄道友云兩領凝清霜玉鑪焚天香為我延歲華得
入不死鄉

又夢仙辭云蟾蜍夜作青冥鏡蟬蛸晴為碧落梯好箇
分明上天路誰教移入武陵溪又有霧紋斑似豹水力
健如龍之句張為取作主客圖

元膺句曲人與段成式同時每愛誦孟不疑句云白日
故鄉遠青山佳句中成式紀之

韋承貽

承貽咸通中策試夜潛紀長句於都堂西南隅云褒衣
博帶滿塵埃獨自都堂納卷回蓬巷幾時聞吉語棘籬
何日免重來三條燭盡鐘初動九轉丹成鼎未開殘月
漸低人擾擾不知誰是謫仙才又曰白蓮千朵照廊明
一片昇平雅頌聲纔唱第三條燭盡南宮風月盡難成

承貽字貽之咸通八年登第

鄭史

史開成元年登第經過池陽廉使崔君悅一妓行雲有
詩云取愛鈿華薄薄粧更兼衣着又鵝黃從來南國名
佳麗何事今朝在北行臨岐博陵公輟贈之

史終國子博士

賈島送史詩曰葛林頗重疊岑渚復幽竒汨水斜陽岍
羈人正則祠蒼梧多蟋蟀白露濕江蘼擢第榮回去晨

昏近九疑

韋楚老

祖龍行云黑雲兵氣射天烈壯士朝眠夢寃結祖龍一
夜死沙邱胡亥空隨鮑魚轍腐肉偷生三千里偽書先
賜扶蘇死墓接驪山土未乾瑞光已向芒碭起陳勝城
中鼓三下秦家天地如崩瓦龍蛇撩亂入咸陽少帝空
隨漢家馬

江上蚊子云飄搖挾翅亞紅腹江邊夜起如雷哭請問

貪婪一點心，臭腐填腹幾多足。
越女如花住江曲，嫦娥夜夜凝雙睞。
怕君撩亂錦牕中，十幅輕綃圍夜玉。
杜牧之送韋楚老拾遺自洛中歸朝云：洛橋風暖細翻衣，春引仙官去玉墀。
獨鶴初沖太虛日，九牛新落一毛時。行開教化期君是，卧病神祇禱我知。
十載丈夫堪耻處，朱雲猶掉直言旗。

楚老長慶進士，終於拾遺。開成時，李德裕代牛僧孺為淮南節度，奏僧孺錢帛事，補闕王績、魏謨、崔黨、韋有翼。

拾遺令狐綯及楚老樊宗仁連章奏德裕妄奏錢帛以
傾僧孺上不問

一從黃帝奠橋山碧落千門鎖元氣

天上行句

唐詩紀事卷五十六

欽定四庫全書

唐詩紀事卷五十七

宋 計敏夫 撰

段成式

成式記云武宗癸亥三年夏予與張君希復善繼同官
秘書鄭君符夢復連職仙局會暇日遊大興善寺因問
兩京雜記及遊日記多所遺略乃約一旬尋兩寺以街
東興善為首二記所不具到則別錄之遊及慈恩初知
官將併寺僧衆草草乃泛問一二上人及記塔下畫跡

遊於此遂絕後三年予職于京洛及刺安成至大中七年歸京在外六甲子所留書籍掬壞居半於故簡中觀與二亡友遊寺瀝血淚交當時造適樂事邈不可追復方刊整纔足續穿蠹然十七五六矣

靖善坊大興善寺寺取大興兩字坊名一字為名新記云優填像總章初為火所燒據梁時西域優填在荊州言隋自臺城移來此寺非也今又有旃檀像開目其工頗拙尤差謬矣

不空三藏塔前多老松歲旱則官伐其枝為龍骨以祈雨蓋三藏役龍意其木必有靈也

東廊之南素和尚院庭有紫桐四株素之手植元和中國卿相遊此院桐至夏有汗污人衣如輶脂不可浣昭國東門鄭相嘗與丞相數人避暑惡其汗謂素曰弟子為和尚伐此木各植一松也及暮素戲祝木曰我種汝二十餘年汝以汗為人所惡來歲若復有汗我必薪汝自是無汗寶歷末予見說已十五餘年無汗矣素公不出

院轉法華經三萬七千部夜常有貉子聽經齋時烏鵲
就掌取食長慶初庭前牡丹一朵合懽有僧元幽題此
院詩警句云三萬蓮經三十春半生不踏院門塵

左顧蛤像舊傳云隋帝嗜蛤所食必兼蛤味數逾千萬
矣忽有一蛤椎擊如舊帝異之寘諸几上一夜有光及
明肉自脫中有一佛二菩薩像帝悲悔誓不食蛤非陳
宣帝

辭老松青桐聯二十字絕句乘晴入精舍語默想東林

盡是忘機侶誰驚息影禽善繼有松堪繫馬過鉢更投針

記得湯師句高禪助朗吟柯古一雨微塵盡支郎許數過

方同嗅簷蔔不用筭多羅符夢蛤像聯二十字絕句雖因

雀變化不逐月虧盈縱有天中匠神工詎可成柯古相好

全如梵端倪祇為隋寧同蚌頑惡但與鷗相持善繼聖柱

連句上有鐵索跡天心惟助善聖跡此開陽柯古載想雷輪重

絙凝電索長善繼上衝扶蠅竦不動束銀鐺柯古饑鳥未曾

啄乖龍寧敢藏

長樂坊安國寺紅樓睿宗在藩時舞榭東禪院亦曰木塔院院門西北廊五壁吳道子弟子釋思道畫釋梵八部不施彩色尚有典刑

禪師法堂影堂世號吉州空者久養一騾將終鳴走而

死有弟子允

元一曰

嵩患風常於空室埋一柱鑠之僧難

輒愈

佛殿開元初明皇拆寢室施之當陽彌勒法空自光明寺移來建都時此像在村蘭若中往往放光因號光明

寺在懷遠坊後為延火所燒唯像獨存法空初移像時
索大如虎口數十牛曳之索斷不動法空執爐依法作
禮九拜泣涕發誓像身忽曝曝作聲身迸分為數十段
不終日移至寺焉

利涉塑堂元和中取其處聖容院遷像廡下上忽夢一
僧形容奇偉訴曰暴露數日豈聖君意耶及明為幸驗
問如夢即令移就堂中側施帷帳安光明寺中鬼子母
及文惠太子塑像舉止態度如生工名李岫 山庭院

古木崇阜幽若山谷當時輦土營之 上座璘公院有
穗栢一林衢柯覆下坐十餘人

辭紅樓連句隱侯體 重疊碎晴空餘霞更助紅蟬蹤

近鳩鵲鳥道接相風善繼苔靜金輪路雲輕白日宮元和帝

幸此 宮 壁詩傳謝客詞人陳至題此院詩云藻井尚 門榜

占休公廣宣上人住此院有詩名時號為紅樓集

穗栢聯句一院暑難侵莓苔可影深枝標爭息鳥餘吹
正開襟柯古宿雨香添色殘陽石在陰乘閑動詩意助靜

入禪心

善繼

題璘公院

一言至七言
每人占兩題

靜虛熱際安居

夢

龕燈斂印香

餘東林賓客西澗圖書簷外垂青豆經中發白渠縱辯

宗因袞袞忘言事理如如

柯竟

泉臺定將入流否鄰笛足

疑青梵余

柯新
度

常樂坊趙景公寺隋開皇三年置本曰弘善寺十八年

改焉南中三門裏東壁上吳道玄白畫地獄變筆力勁

怒變狀陰恠覩之不覺毛戴吳畫中得意處三階院西

廊下范長壽畫西方變及十六對觀寶池尤妙絕諦視
之覺水入浮壁院門上白畫樹石頗似閭立德予携立
德天祠粉本驗之無異西中三門裏門南吳生畫龍及
刷天王鬚筆蹟如鐵有執爐天女竊眸欲語

辭吳畫聯句 慘淡十堵內吳生縱狂跡風雲將逼人

神鬼如脫壁

柯古

其中龍最恠張甲方汗栗黑雲夜窸窣

焉知不霹靂

善繼

此際忽仙子獵獵衣烏奕妙瞬乍疑生

參差奪人魄

夢

往往乘猛虎衝梁聳竒石蒼峭束高泉

角膝警敬側柯冥獄不可視毛戴腋流液苟能水成河

剎那沈火宅

題約公院四言

印火熒熒燈續焰青

善

繼七俱胝咒四

阿含經

柯

各錄佳語聊事素屏

夢

丈室安居延賓不局

上人

大同坊雲化寺大歷初僧儼講經天雨花至地咫尺而
滅夜有光燭室敕改為雲華儼即康藏之師也康本住
恭靖里氈曲忽覩光如輪衆人皆見遂尋光至儼講經

所滅佛殿西廊立高僧一十六身天寶初自南內移來
畫蹟拙俗觀音堂在寺西北隅建中末百姓屈嚴患瘡
且死夢一菩薩摩其瘡曰我在雲華寺嚴驚覺汗流數
日而愈因詣寺尋檢至聖畫堂見菩薩一如其觀也

辭偶聯句共入夕陽寺因窺甘露門

昇工

清香惹苔蘚

忍草雜蘭蓀

夢

提倡飛箱荅新詩倚杖論

柯

壞幡標古

刹聖畫煥崇垣

善繼

豈慕穿籠鳥難防在牖

柯

一音唯

一性三語更三幡

善繼

道政坊寶應寺韓幹藍田人少時常為酒家送酒王右丞兄弟未遇每貰酒漫遊幹常徵債於王家戲畫地為人馬右丞精思丹青竒其意趣乃歲與錢二萬令學畫十餘年今寺中釋梵天女悉齊公妓小小等寫真也寺有韓幹畫下生彌勒衣紫袈裟右邊仰面菩薩及二師子漆之如羅睺羅每盆供日出之寺中彌勒殿齊公寢堂也東廊北面楊岫之畫鬼神齊公嫌其筆蹟故止一宿

辭僧房聯句古畫思厓嶺上方疑傅崑蝶閑移忍草蟬

曉揭高杉古柯香字消芝印金經發菴函井通松底脉書

圻洞中緘善繼

小小寫真聯句如生小小真猶自未棲塵夢褵袂將離

座斜柯欲近人古柯昔時知出衆情寵占橫陳善繼不遣遊

張巷豈教窺宋鄰夢庾樓吹笛裂弘閣賞歌新蟬怯織

腰步蛾驚半額頰善繼圖形誰有術買笑詎辭貧柯復隴

迷村徑重泉隔漢津夢同心知作羽比目定為鱗善繼殘

月巫山夕餘霞洛浦晨

平康坊菩薩寺佛殿東西障日及諸柱上圖畫是東廊
跡舊鄭法士畫開元中因屋壞移入大佛殿內北壁食
堂前東壁上吳道玄畫智度論色偈變偈是吳自題筆
跡遒勁如磔鬼神毛髮次堵畫禮骨仙人天衣飛揚滿
壁風動佛殿內後壁吳道子畫消災經事樹石古嶮元
和中上欲令移之慮其摧壞乃下詔擇畫手寫進佛殿
內槽壁維摩變舍利佛角膝而轉元和末俗講僧文淑

裝之筆蹟盡矣故興元鄭公尚書題此壁僧院詩曰但
慮彩色污無虞臂胛肥置寺碑陰彫飾奇巧相傳鄭法
士所起樣也初會覺上人以利施起宅十餘畝工畢釀
酒百石列餅甕於兩廊下引吳道玄觀之因謂曰檀越
為我畫以是賞之吳生嗜酒且利其命欣然而許予以
蹤跡似不及景公寺畫中三門內東門神善繼云是吳
生弟子王耐兒之手也

辭書事聯句悉為無事者任被俗流憎夢客異干時客

僧非出院僧

柯

遠聞疎牖磬曉辨密籠燈

善

步觸珠幡

響吟窺鉢水澄

夢

句饒方外趣遊愜社中朋

柯

靜裏已

馴鴿齋中亦好鷹

善

金塗筆是裝彩溜紙非繒

昇

錫

杖已尅鍛田衣從壞膝

柯

占牀暫一脅卷箔賴長肱

善

佛日初開照魔天破幾層

柯

呪中陳秘計論處正先登

善繼勇帶綻針石危防邱井籐

宣陽坊奉慈寺開元中號國夫人宅安祿山偽置百官

以田乾真為京兆尹取此宅為府後為郭曖駙馬宅今

上即位之初太皇太后為昇平公主追福奏置奉慈寺
賜錢二十萬綉幘三車抽左街十寺僧四十人居之今
有僧惟則以七寶木摹阿育王舍利塔自明州負來寺
成後二年司農少卿楊敬之小女年十三以六韻成詩
題此寺自稱關西孔子二十七代孫字德麟警句云日
月金輪動旃檀碧樹秋塔分鴻雁翅鐘掛鳳凰樓事因
見勅賜衣

光宅坊光宅寺本官蒲萄園中禪師影堂師號惠中肅

宗上元二年徵至京師初居此寺詔云杖錫而來京師
非遠齋心已久副朕虛懷

辭中禪師影堂聯句名下固無虛教曹貌嚴毅洞達見

空王圓融入佛地善繼一言當要害忽忽醒諸醉不動湏

彌山一云不動如湏彌多方辯無置夢坦率對萬乘偈荅無所

避爾如毗沙門外形如脫履柯但以理為量不語恠力

事木石催貢高慈悲引貪恚昇上人當時之支許何人契

深致隨宜詎說三直下開不二柯古

翊善坊保壽寺本高力士宅天寶九載捨為寺初鑄鐘
成力士設齋慶之舉朝畢至一擊百千有規其意連擊
二十杵經藏閣規創危巧二塔火珠受十餘斛河陽從
事李涿性好竒古與僧智增善嘗俱至此寺觀庫中舊
物忽於破瓮中得物如被幅裂汚盆觸而塵起涿徐視
之乃畫也因以州縣圖三及緜三十獲之令家人裝治
之大十餘幅訪於常侍柳公權方知張萱所畫石橋圖
也明皇賜高因留寺中後為鬻畫人宗牧言於左軍尋

有小使領軍卒數十人至宅宣勅取之即日進入先帝
好古見之大悅命張於雲韶院寺有先天菩薩幀本起
成都妙積寺開元初有尼魏八師者常念大悲咒雙流
縣百姓劉乙意兒年十一自欲事魏尼尼遣之不去常
與室立禪嘗白魏云先天菩薩見身此地篩灰於庭一
夕有巨跡數尺輪理成就因謁畫工隨意設色悉不如
意有僧楊法成自言能畫意兒常合掌瞻仰然後指授
之以匠十稔工方就後塑先天菩薩凡二百四十首首

如塔勢分臂如意蔓其膀子有一百四十日鳥樹一鳳
四翅水肚樹所題深恠不可詳悉畫樣凡十五卷柳七
師者崔寧之甥分三卷往上都流行時魏奉古為長史
進之後因四月八日賜高力士今成都者是其次本

辭光天幘讚聯句觀音化身厥形孔恠脰腦淫厲衆魔

膜拜善繼指夢鴻紛膀列區界其事明張何不可解柯閻

河德川大士先天衆象參羅暎暎田田夢百億花發百

千燈燃膠如終澤浩汗連綿善繼焰摩界戚洛迦苦霽正

念皈依衆如青慧柯戾滓可汰癡膜可蛻稽首如空眸

容若睇善繼闡提墨師覩而面之寸念不生未遇乎而柯

宣陽坊靜域寺本太穆皇后宅僧寺云三階院門外是

神堯皇帝射孔雀處禪門內外遊日記云王昭隱畫門

西裏面和修吉龍王有靈門內之西火目藥叉及北方

天王甚竒猛門東裏面賢門也野叉部落鬼首上蝮蛇

汗烟可懼東廊樹石嶮恠高僧亦恠西廊萬菩薩院門

裏南壁皇甫軫畫鬼神及鷗鷗勢若脫軫與吳道玄同

時吳以其藝逼已募人殺之萬菩薩堂內有寶塔以小
金銅塔數日飾之大厯中將作劉監有子合手出胎七
歲念法華經及卒焚之得舍利數千粒分藏於金銅塔
中善繼云合是釧鈿佛殿東廊有古佛堂其地本雍村
堂中像設悉是石作相傳云隋恭帝終此堂

三階院聯句密密助堂堂隋人歌壓桑雙鷗推孔雀一
矢隕貪狼柯古百步望雲立九規看月張獲蛟徒破浪中
乙漫如墻善繼還似貫金鼓更疑穿石梁因添挽河力為

滅射天狂

何

絕藝却南牧英聲來鬼方麗電何足敵殪

豕未為長

懲

龍臂勝猿臂星芒超箭芒虛誇絕高鳥垂

拱議明堂

柯古

崇義坊招福院本曰正覺國初毀之以其地立第賜諸
王睿宗在藩居之乾封二年移長寧公主佛殿於此重
建此寺

贈諸上人聯句翻了西天偈燒餘梵字香攬眉愁俗客

支頰背殘陽

柯古

州號唯思沃山名祇記匡辯中推世智

定裏破魔強善繼許獻禪心徹湯休詩思長助吟疎磬斷

久語貫珠妨柯古乘興書芭葉閑來入豆房漫題存古壁

惟畫匝長廊善繼

招國坊崇濟寺寺內有天后織成綾龍披襖子及綉衣
六事東廊從南第二院有宣律師製袈裟堂曼殊堂有
松數株甚奇

辭宣律和尚袈裟絕句善繼云共覆三衣中夜寒披時
不鎮尼師壇無因蓋得龍宮地畦裏塵飛業相殘和前

雲南山披時寒夜中一角不動毗嵐風何人見此生慙
愧斷續猶應護得龍

奇松聯二十字絕句杉松何相疎榆柳方迥屑無人擅

談柄一枝不敢折古柯中庭苔蘚深吹餘鳴佛禽至於摧

折枝凡草猶避陰善繼僻徑根從露閑房枝任侵一株風

正好來助碧雲吟夢時時掃牕聲重露滴寒砌風颭一

枝適閑窺別生勢昇工偃蓋入樓妨盤根侵井窄高僧

獨惆悵為與燈嵐隔古柯

永安坊永壽寺三門東吳道子畫似不得意佛殿名會
仙本是內中梳洗殿貞元中有証智禪師往往靈驗或
時在張積蘭中若治田及夜歸寺若在金山界相去七
百里

辭閑中好閑中好盡日松為侶此趣人不知輕風度僧
語夢
閑中好塵務不縈心生對當窓木看移三面陰柯古

閑中好幽磬度鐘遲卷上論題肇畫中僧姓支

善繼

崇仁坊資聖寺淨土院門外相傳吳生一夕秉燭醉畫

就中戰手視之惡駭院門裏盧稜伽常學吳勢吳亦授
以手訣乃畫摠持三門寺方半吳大賞之謂人曰稜伽
不得心訣用思太苦其能久乎畫畢而卒中門牕間吳
畫高僧韋述贊李嚴書中三門外兩面上層不知何人
畫人物頗類閻令寺西廊北隅楊坦畫近塔天女明睇
將瞬團塔院北堂有鐵觀音長三丈餘觀音院兩廊四
十二賢聖韓幹畫元中書贊東廊北頭散馬不意見者
如將嘶蹠聖僧中龍樹商那和修絕妙團塔上菩薩李

真畫四面花鳥邊鸞畫藥師菩薩頂上戎葵尤佳塔中
藏千部法華經

辭諸畫聯句栢梁體吳生畫勇矛戟攢柯出變奇勢千

萬端善繼蒼蒼鬼恠層壁寬夢觀之忽忽毛髮寒柯稜伽

之力所疲殫柯李真周昉優劣難夢活禽生卉推邊鸞

柯花房嫩彩猶未乾善繼韓幹變態如激湍夢惜者壁畫

勢未殫後人新畫何汗漫善繼

成式字柯古文昌之子博學強記多奇篇秘籍嘗於私

第鑿池得片鐵命尺周量之笑而不言寘之密室時窺之則有金書二字報十二時也

成式博物類此終太常少卿

成式與溫庭筠雲籃紙詩序曰予在九江多意造之分送五十詩云三十六鱗充使時數番猶得裏相思待將袍襖重抄了盡寫襄陽播搭詞

成式酉陽雜俎云古樂府木蘭篇願賜明駝千里足送兒還故鄉明字多誤作鳴駝卧腹不帖地屈足漏明則

行千里又云波斯國謂象牙為白暗犀角為黑暗故老
杜有黑暗通蠻貨之句又載鬼詩二篇云長安女兒踏
春忙何處春歸不斷腸舞袖弓彎渾忘却蛾眉空帶九
秋霜又云流水娟娟芹發牙織鳥雙飛客還家荒村無
人作寒食殯宮空對棠梨花

酉陽雜俎云一夕予坐客互送連句為煩乃命工取細
斑竹以白金鎖首如茶挾以遞聯名之予在城時常與
客聯句初無虛日小酌求狎或窮韻相角或押惡韻或

煎茗一椀為八韻詩謂之雜連若志於不朽則汰揀穩
韻無所得輒已謂之苦聯聯時共押平聲好韻不僻者
出於竹簡謂之韻牒出城忘携行坐客句枝韻牒之語
必為好事者所傳矣因說故相牛公楊州賞秀才蒯希
逸詩蟾蜍醉裏破蛺蝶夢中殘每坐吟之予因請坐客
各吟近日為詩者佳句有吟賈島舊國別多日故人無
少年馬戴猿啼洞庭樹人在木蘭舟又骨銷金鏃在有
吟僧無可河來當塞斷一曰盡山一曰岸遠與沙平又開門

落葉深有吟張祐河流側讓關山一曰又泉聲到池盡有

吟僧靈準詩晴看漢水廣秋覺峴山高吟朱景玄塞鴻
先秋去邊草入夏生予吟上都僧元礎守隔殘潮去又
採藥過泉聲又林塘秋半宿風雨夜深來予識蜀中客
龐季子每云寒雲生易滿秋草長難高

成式有漢上題襟十卷

光風亭夜宴妓有醉毆者温飛卿曰若狀此便可以痕
面對捩胡成式乃曰捩胡雲彩落痕面月痕消又曰擲

履仙鳧起捲衣蝴蝶飄羞中含薄怒頰裏帶餘嬌醒後
猶攘腕歸時更折腰狂夫自纓絕眉勢倩誰描韋蟾云
爭揮鈎弋手競聳踏謠身傷頰詎關舞捧心非効嘖飛
卿云吳國初成陣王家欲解圍拂巾雙雉叫飄瓦兩鴛
飛



唐詩紀事卷五十七